A icel mot li messager est turnez, Ogier l'ameine, li Daneis alosez, E li duc Naimes est ovec eus alé ;

368 Entre dous ewes l'ont mené es prez.
 A haltes fenestres est li reis alez,
 Les duze pers at a sei apelez :
 « Seingnurs, fait il, od mei vus venez.

372 Faites Franceis tuz eissir des prez. »
Il si funt, a eus dous les ont abandunez.
Charle escrie : « Des ore vus combatez. »
Dist Otinel : « Jo sui tut aprestez. »

XIII

- 376 Rodlant a dit al Paen : « Mescreant, Jo te defi desci en avant. » Dist li Paen : « E jo tei ensement.
- (b) Bien vus guardez kar jo ne t'aim nïent,
 380 La mort mun uncle Fernagu vus demant. »
 Rollant lait curre le bon destrer Bruiant,
 Otinel Migrados, le bien curant;
 Des esperuns les destreinent forment.
 - 384 Entre le bruit e l'efort e le vent,
 Li prez en croule e la terre ensement.
 Les hantes brandient e beissent forment,
 Li gunfanun ventelent vers le vent.
 - 388 Granz colps se donent en lur escuz devant, Trenchent les fuz e les quirs ensement Meis li halberc sunt serré e tenant. Maille n'i false ne clavel n'i destent.
 - 392 Sur les peitrines plient li fer trenchant. Les hanstes brisent amdui cummunement. Ultre s'en passent li chevaler vallant Que l'un ne l'altre n'i pert nïent.
 - 396 « Deu, dit li reis, or vei merveille grant Quant cist Paien s'est tenu vers Rodlant. » Dit Belisent : « Bon sunt mi garnement E cil ki.s porte pas cuard ne lent. »
 - 400 Rodlant a treit Durendal le trenchant,

[213V](c)

Fiert Otinel sur le healme luisant Que flurs e pieres cheent avalant E sun nasel lui a toleit devant.

- 404 A l'altre colp fiert le destrer currant,
 Le chief li trenche del col tut rundement.
 Li Paen, quant sun cheval li ment,
 Dist dous moz : « Par Mahumet Rollant,
- 408 Vus avez feit vilainie mult grant, Que mun destrier m'avez mort pur nïent. Que demandiez a mun bon auferant ? Mes ja le vostre ne s'en irra gabant. »
- 412 Del [f]uerre sacke Cureçuse la grant, L'escu enbrace e feit un salt avant. Si fiert Rollant sur le healme luisant Ke li nasel se vait tut avalant :
- 416 Li colp glaceie sur l'arçun devant, Trenche le fust e le feutre ensement. Par les espaules a trenché le Bruiant, Desk'en la terre feit culer le brant.
- 420 En halt s'escrie : « Ço n'est pas colp d'emfant. » « Deu, dist li reis, cum ço colp fu pesant ! Sainte Marie guardez mei Rollant, Se li quens chiet, ne m'esmerveil nïent. »
- 424 Il tient l'espee, si estreint durement, Fiert le Paen sur le healme qui resplent K'un quartier encuntreval descent, Trenche les mailles del halberc jacerant
- 428 E del oreille une partie en prent.
 Sun bon escu desk'en la bucle fent.
 La l'eüst mort, vencu u recreant,
 Mes Otinel at hardement mult grant.
- 432 De Curçuse l'acuilt durement, E Rodlant lui od l'espee trenchant, De Durendal le fiert menuement. Granz colps s'entredonent e derere e devant,
- 436 Vers les espees ne valt le halberc nïent ; Des mailles luist tut li pré e resplent. Dist Belisent : « Ore fierent gentement. » Ceste bataille ne dura mie lungement

⁴⁰² ms. Que flurs piers, e suscrit. 412 ms. D. suerre s.